

Joel Costa Malabanan

 [facebook.com/story.php](https://www.facebook.com/story.php)

Mga Dalit sa Panahon ng Pandemya

Joel Costa Malabanan

1. "Carpe Diem"

Yakapin ang sinisinta

Habang iyong kasama pa:

Pagkat sa isang kisap-mata

Ay baka maging abo na!

2. Paghuhukom

Paghuhukom itong bayrus

At sumulpot, sadyang hangus;

Lahat ay nakipagtuos

Luha ng balo, bumuhos!

3. Hindi Biro

Hindi biro itong Covid

Minsan akong nabilibid

Hininga ko'y ipiniit

Muntik akong mapalangit!

4. Misteryo ng SAP

Rosaryo ang pila sa SAP

Misteryo: sinong tatanggap;

Himalang di mahanap

Pondong ninenok ng korap!



5. "Hilahil"

Bakit kasi nanggigigil

Sa Anti-Terrorism Bill?

Samantalang ang hilahil:

Pandemya muna'y mapigil

6. Malungkot na Reyalidad sa Panahon ng Pandemya

Pag humatsing o umubo

Diretso sa krematoryo

Sumipsip sa pulitiko,

May ayuda, sigurado!

7. Abo

Dahil sumasagip ng buhay

Ang Frontliner na si Tatay

Nang umuwi na sa bahay

Bayaning abo nang tunay!

8. Virus VS Pulitiko

Walang habag itong virus

Ang dapuan, buhay: tapos

Pulitiko pag kumilos

Bulsa'y di naghihikahos!

9. Katiwalian sa Panahon ng Pandemya

Pondong Philhealth ay winaldas

Ng kawatan, mga ahas;

Usigin nawa ng batas



At paghimasin ng rehas!

10. Aral ng Pandemya

Tanging aral ng pandemya

Pinagbuklod ang pamilya;

Manalanging sama-sama

Bukas, yakap ang pag-asa!

11. Bigas na Lang Sana

Bigas sana na pansaing

Ayuda ang siyang daing

Saka na lang ang buhangin

Pandemya ang atupagin!

12. "Agwatang Sosyal"

May mananitang Heneral

Sa panahong dapat bawal

Kaya ang agwat-pisikal

Tunay na agwatang sosyal!

13. Ang Nawawalang SAP

Di maapuhap itong SAP

Walang sardinas, ni sapsap

Ayudang pinapangarap

Bulsa ni Kap ang tumanggap!

14. Tigil-Bangay Muna

Dilawan man o DDS

Sa pandemya'y nagtitiis



Bayaniha'y bigyang hugis

Ang pagbangon ay bibilis!

15. Distance Learning

Mag Zoom pa man o Google Meet

May gadget man at internet

Gurong teki pa rin ang bet

Upang dunong ay makamit!

16. Bigas Muna Bago Face Shield

Walang face shield, walang pera

Di salat sa disiplina

Bigas muna ang inuna

Pagkat gutom ang pamilya!

17. Protocol

Walang pang lunas ang Covid

At ang tanging nababatid

Disiplina lang kapatid

Upang buhay di mapatid!

18. Positibo

Na-quarantine ang bayan ko

Tripleng singil ng Meralco

Natatanging positibo:

Ay ligtas ang pamilya ko.

19. Padulas ni Kap

Ang ayuda ay nawaldas



Pagkat si Kap may padulas;

At nang hinabol ng batas

Ngayon ang himas ay rehas!

20. Lupit ng Covid

Lupit, lubid nitong Covid

Piit, tao'y binilibid

Higpit, bitbit ay hagupit

May kabaong sa makulit!

21. Ligtas

Sa bahay ay sadyang ligtas

Sa Covid di mauutas;

Ngunit kung ang bulsa'y butas

Sa gutom, hantunga'y wakas!

22. Digmaan

Digmaan ay bagong anyo

Birwal na ang pagkatuto;

Panginoon ay negosyo

Pulitiko ang kasosyo!

23. Ang Guro sa Bagong Normal

Ang guro ay isang mortal

Na nagiging emosyonal

Kung pag-asa'y nasa kanal

Sa lupit ng Bagong Normal!

24. Galak na Nakapinid



Gunita'y di kayang ibalik

Mainit na yakap at halik

Pighati ang tanging hatid

Sa galak na nakapinid!

25. Distance Learning

Pag inako ng magulang

Sa anak na pagkukulang;

Bata ay lalaging mangmang

Tiyak na paglaki'y timang!

26. Junk

Ang online selling ay may tax

Ekonomiya ay bagsak

Militarization to the max

Ang Anti-terror bill i-junk!

27. *Pag-ibig sa Panahon ng Covid

Mundo ngayon ay digital

Pati pag-ibig, may portal

Damdaming kikiwal-kiwal

Sa online man ay susugal!

(*nagtamo ng Ikatlong Karangalan sa Tula Tayo ng KWF)

